


TEZAU LITURGIC
3 Iunie

ACATISTUL
SF. CUVIOS
DIMITRIE
DE LA
PRILUŢK



MOSCOVA, 2000



Акафист
святому преподобному
Димитрию, игумену
Прилуцкому, Вологодскому
чудотворцу

Кондак 1

Избранный чудотворче и изрядный угодниче Христов, преподобне отче наш Димитрие, друже и собеседниче друга Божия преподобнаго Сергия и Отечества твоего присный заступниче; приими от нас с любовью приносимое тебе хвалебное пение и, яко имеяй дерзновение ко Господу, молитвами твоими от всяких нас бед свободи, да зовем ти:

Радуйся, Димитрие, великий чудотворче.

Икос 1

Ангел образом, аще и человек по естеству, был еси, преподобне отче Димитрие, ангельскую

бо чистоту стяжал еси на земли, и ангельскою красотою лице твое цветяше, яко всем, видевшим тя, чудится благолепию твоему. Темже, яко избранника Божия, благолепнаго душею и телом, ублажаем тя песньми сими;

Радуйся, благочестивых родителей пречестное порождение;

радуйся, града Переяславля-Залесскаго святое прозябение.

Радуйся, Российския страны духовное украшение;

радуйся, евангельскаго по Бозе жития ревнителю.

Радуйся, от юных лет жизни твоея единаго Христа вседушно возлюбивый;

радуйся, сладчайшаго Иисуса паче всех красот земных возжелавый.

Радуйся, богатство тленное и куплю временную презревый;

радуйся, куплю духовную мудро совершивый.

Радуйся, драгий бисер Христа усердно взыскавый;

радуйся Его заповеди святых свет стезям твоим имевый.

Радуйся, серафимскою любовью ко Господу сердце твое воспламенивый;

радуйся, дары Святаго Духа в душу твою достойно восприявый.

Радуйся, Димитрие, великий чудотворче.

Кондак 2

Видевше родители твои, преподобне отче, яко не прилежало сердце твое к богатству земному, но яко от младых ногтей предпочитал еси искати едино на потребу, еже служити и благоугождати Христу чистым и непорочным житием, премнаго удивляхуся таковому твоему благонравию и радостно воспеваху Богу, в юности сие ты укрепившему, благодарственную песнь: Аллилуия.

Икос 2

Разум богопросвещенный стяжав, уразумел еси добре, отче Димитрие, указуемый Спасителем мира путь к высшему совершенству духовному. Темже по смерти родителей твоих абие куплю временную оставил еси, и все богатство твое нищим расточил еси, себе

облегчая к непреткновенному течению во след Христа. Сего ради ублажаем тя благохваленъими таковыми:

Радуйся, подвижниче Божий, мира красотами не прельстивыйся;

радуйся, слуго Господень, во след Владыки твоего Христа радостно потекий.

Радуйся, нищету вольную Христа ради возлюбивый;

радуйся, богатство многое меньшим братьям Христовым раздавай.

Радуйся, нищия и убогия от имени твоего удовливый;

радуйся, нагия одевай и гладныя напитавай.

Радуйся, вдовицам и сиротам отец и благодетель бывый;

радуйся, наследие родителей твоих богоугодно расточивый.

Радуйся, крест Христов носити усердно возжелавый;

радуйся, смирение Христово в душу твою насадивый.

Радуйся, целомудрие души и тела невредно сохранивый;

радуйся, постом и воздержанием юношеския страсти обуздавый.

Радуйся, Димитрие, великий чудотворче.

Кондак 3

Сила духовная свыше от Господа тебе даровася, преподобне отче, егда в пострижении иночестем ангельский образ на ся восприял еси, и всякое плотское мудрование совершенно отложил еси яко быти тебе воистину последователем Христовым; на Христа бо единого присно взирал еси умными очима души твоя, и Его заповеди святыя выну имел еси пред собою, яко светильник путеводящий, зовый Ему от любве теплыя: Аллилуия.

Икос 3

Имея попечение о спасении души твоя, безмолвия возжелал еси, преподобне отче, и на месте блатнем и пустыннем близ града Переяславля-Залесскаго поселился еси, един единому Христу работая в посте и молитвах; обаче не утаися житие твое преподобное от сограждан твоих, иже прихождаху к тебе, ови

молитв и благословения от тебе просяще, ови наставитися во спасение от тебе желая, инии же жителствовати с тобою хотяху, под твоим духовным руководством; ты же грядущих к тебе не отгонял еси, но спасению душ человеческих ревностно служил еси, еже вспоминая, хвалебно вопием ти:

Радуйся, учителю благочестия, примером жития твоего всех поучавый;

радуйся, наставниче богомудрия, словеси твоими богодухновенными ученики твоя во спасение назидавый.

Радуйся, иночества богоугодного правило известное;

радуйся, пути тесного, во Царствие небесное ведущаго, указателю нелестный.

Радуйся, евангельских заповедей верный исполнителю;

радуйся, апостольских преданий ревностный хранителю.

Радуйся, непоколебимый столпе Православия;

радуйся, небоязненный обличителю всякаго инославия.

Радуйся, сотворивый и научивый и велий нареченный во Царствии Небеснем;

радуйся, со усердием послуживый спасению многих душ человеческих.

Радуйся, отче, отцев красото;

радуйся, богомудрия исполненная священная главо.

Радуйся, Димитрие, великий чудотворче.

Кондак 4

Бурное треволение житейскаго моря безбедно преплыл еси, всеблаженне отче, и в тихое пристанище пустыни достигл еси, в ней же обитель иноком возградил еси во имя святителя и чудотворца Николая, и сам освящения иерейскаго сподобился еси, игумен богомудрый обители твоя быв, кротко пасый Богом врученныя тебе словесныя овцы, и немолчно воспевая купно с ними хвалебную песнь Пресвятей Троице: Аллилуия.

Икос 4

Слышав о дивней красоте лица твоего, отче Димитрие, едина от именитых болярынь града Переяславля-Залесскаго, возжела насладитися

лицезрения твоего и сего ради прииде к келлии твоей, в нюже оконцем приникнув, узре тя на молитве стояща и светом небесным облиставаема, сама же абие всем телом расслабе и падши аки мертва на земли лежаше; ты же, послушествуя прошению братии твоей, молитвою твоею исцелил еси ю и поучил, да прочее уцеломудрится и не назирает чуждыя красоты, тем же мы, чтуще таковую чистоту души твоея, вопием ти сице:

Радуйся, светильниче Божия благодати, дарами Духа Святаго светло блистающий;

радуйся, еще на земли светом небесным озаренный.

Радуйся, светом лица твоего велию светлость души твоея проявивый;

радуйся, небесным светом жену нескромную уцеломудривый.

Радуйся, расслаблением телесным нескромность ея наказавый;

радуйся, молитвою твоею милостивно ю исцеливый.

Радуйся, словесы твоими духовными добре ю поучивый;

радуйся, прочее хранити опасно целомудрие ю увещавый.

Радуйся, крине девства и чистоты, на земли процветший;

радуйся, непорочность души и тела твоего соблюдый верно.

Радуйся, красоту лица твоего завесою иноческаго куколя сокрываваый от нечистых воззрений очес человеческих;

радуйся, опасно себе храниваый от искушений, от обращения и собеседований с женами бываемых.

Радуйся, Димитрие, великий чудотворче.

Кондак 5

Богосветлое светило быв, отче Димитрие, великаго светильника пустыни Радонежския, богоноснаго Сергия, подвига еси посетити тя, в безвестней и блатней пустыни жившаго; его же с любовью о Христе радостно приял еси и духовным собеседованием с ним утешился еси, и от таго времени друг присный и сотаинник ему соделался еси, ныне же вкупе с ним предстоиши небесному Престолу Триадинаго Бога и сладце поеши ему: Аллилуия.

Икос 5

Видевше тя, преподобне отче Димитрие, к богоносному отцу Сергию, любовь велию о Христе стяжавшаго, на собеседование к нему духовное от пустыни твоя пешеходившаго, с ним вкупе бдения всенощныя совершавшаго, при них же лучина свечи вам заменяше, молитва же ваша, яко пламень огненный, до небес досязаше, дивимся таковому содружеству твоему с великим угодником Божиим и сие тебе зовем:

Радуйся, друже святых, присный Богу;

радуйся, спостниче и собеседниче преподобнаго Сергия.

Радуйся, всесветлаго солнца земли
Российския сопутствующая деннице;

радуйся, всероссийскаго заступника и
молитвенника любимый сомолитвенниче.

Радуйся, от уст Сергиевых глубину
премудрости духовныя почерпнувый;

радуйся, сотаинник ему верен бывый.

Радуйся, содружество с ним до конца живота
твоего сохранивый;

радуйся, велию любовь о Христе к нему
стяжавый.

Радуйся, восшедый на высоту совершенства
духовнаго;

радуйся, приикий во глубину смирения
святаго.

Радуйся, земный ангеле, на земли небесно
поживый;

радуйся, небесный человеце, во плоти
безплотным поревновавый.

Радуйся, Димитрие, великий чудотворче.

Кондак 6

Проповедника тя благоумиленнаго познав,
отче Димитрие, благоверный великий князь
Димитрий зело тя возлюби и отца духовнаго себе
сотвори, восприемником же от святаго
Крещения единому от сыновей своих тя избра,
да будеши присный наставник и молитвенник
ему со чады; ты же преподобие, не возгордился
еси толикою любовью к тебе великаго князя
Российскаго, но паче преуспевал еси во святем
смирении, зовый прославльшему тя Владыце
Богу: Аллилуия.

Икос 6

Возсия добродетелей твоих свет велий во всю страну Российскую, преподобне отче наш Димитрие, и мнози прихождаху к тебе издалеча насладитися богодухновенных твоих учений; быша бо уста твоя полна сладкаго учения духовнаго, язык же твой, яко трость книжника скорописца, написоваше на сердцах человеческих словеса жизни вечныя. Тем же яко благоумиленнаго учителя и к покаянию действеннаго возбудителя восхваляем тя по достоянию сице:

Радуйся, врачу благоискусный недугов душевных;

радуйся, пластырем словес твоих богодухновенных исцеливый язвы греховныя многих.

Радуйся, возбудивый к покаянию спящия совести;

радуйся, умягчивый ко исправлению окаменелая сердца.

Радуйся, князей и бояр добрый наставниче; радуйся, иноков и мирян ко спасению верный руководителю.

Радуйся, правило веры истинныя;
радуйся, образе кротости духовныя.

Радуйся, правды Божией нелицеприятный
провозвестниче;

радуйся, сильных мира, о правде
нерадивших, небоязненный обличителю.

Радуйся, обидимых и гонимых мнагомощный
защитниче;

радуйся, вдовиц и сирот благосердый
покровителю.

Радуйся, Димитрие, великий чудотворче.

Кондак 7

Хотение усердное имел еси, преподобно отче,
да в безмолвии невозбранно поработаеши Богу,
и сего ради убегая молвы приходивших к тебе
людей, оставил еси тайно обитель твою и град
отечества твоего и с учеником твоим Пахомием
удалился еси в пределы вологодския, в пустыню
безлюдную, в нейже келлию себе малу соорудив,
тамо пребывал еси безмолвно в подвизах
пустынных, немолчно воспевая Христу Богу
ангельскую песнь: Аллилуия.

Икос 7

Новую обитель иноческую, зачинаемую в пустыни, видевшие окрестные жители, грубостию нрава содержимии, гневахуся на тя, преподобне отче, и поношаху тя, яко поселился еси на земли их; ты же, по евангельскому Христову глаголу, место гневу их уступая, отшел еси от тоя пустыни и ко граду Вологде приблизился еси, в предградии его, на Прилуцех, поселитися возжелев, идеже мы ныне чествуем тя, яко отца и первоначальника иноков вологодских, и песненно тебе вопием:

Радуйся, пустыннолюбивая горлице, от шума мирскаго в благоотишие пустыни отлетевшая;

радуйся, незлобивая голубице, гневом неразумных человеков неуязвленная.

Радуйся, мудрый странниче, иский отечества горняго;

радуйся, Божий избранниче, презревший вся красоты мира дольнаго.

Радуйся, худыя и многошвенныя ризы носивый;

радуйся, веригами железными тело твое обложивый.

Радуйся, Крест Христов, яко оружие непобедимое, спутника себе стяжавый;

радуйся, икону Пресвятыя Богородицы, яко стену ограждения, всегда с собою имевый.

Радуйся, звездо богосиянная, от юга к северу притекшая;

радуйся, пределы вологодския духовно просветивый.

Радуйся, пустыню бесплодную благодатно у плодоносивый;

радуйся, на Прилуцех место вселению твоему возлюбивый.

Радуйся, Димитрие, великий чудотворче.

Кондак 8

Странник и пришлец был еси во граде Вологде, преподобне отче наш Димитрие, ныне же присный предстатель и заступник его являешися нам, с любовью воспоминающым святое твое пришествие; видев бо град, церквами святыми благоукрашенный, возлюбил еси его и, по умолению жителей его, на Прилуцех, в предградии его, место уединенное обрет, на нем вселился еси и, честный Крест руками своима соделав, водрузил еси, начало

обители Спасовой полагая и присно воспевая распеншемуся на Кресте Царю Славы Христу: Аллилуия.

Икос 8

Весь в Бозе быв, преблаженне отче, о временных вещех не заботился еси, и обитель твою на Прилуцех не толико богатством, колико слезами и подвигами твоими молитвенными созидал еси, всецело уповая на Спаса Христа, яко Сам препитает тя с братиею твоею; и тако бысть по вере и молитве твоей; ни в чесом бо лишен был еси, но во всех потребных к житию изобиловал еси Промыслом Божиим дивным. О сем тя хвалим и взываем сице:

Радуйся, верою праотцу Аврааму подражавый;

радуйся с посохом странническим во град Вологду пришедый.

Радуйся, в нем второе отечество себе обретый;

радуйся, любовью о Христе крепце его возлюбивый.

Радуйся, обитель Спасову в предградии его соорудивый;

радуйся, подвиги твоими сию прославивый.

Радуйся, града Вологды Богом дарованный
небесный заступниче;

радуйся, святых обители твоея неусыпный
хранителю.

Радуйся, яко отец чадолюбивый, молитвенно
назирая чад твоих духовных;

радуйся, яко воевода благоискусный
ограждай люди твои от всякаго зла.

Радуйся, пророче дивный, будущая яко
настоящая провидевый;

радуйся, целителю безмездный, болящих
молитвою твоею исцелявый.

Радуйся, Димитрие, великий чудотворче.

Кондак 9

Вси ангели небеснии и святых лица сретоша
тя радостно, преподобне отче Димитрие, егда
святая твоя душа, кончиною преподобною
разрешившись от соуза плотскаго, восхождаше
в обители горния; и Сам Творец ангелов и
Святый Святых, Христос Господь, тобою от
юности возлюбленный, увенча тя венцем
нетленных славы и сопричте лику святых, выну

воспевающих Ему песнь хвалы и славословия:
Аллилуия.

Икос 9

Витий человеческих благословесие не довлеет к достойному прославлению многих подвигов твоих, преподобне отче наш Димитрие, имиже житие твое святое яко цветами благоукрашается и духовно благоухает; от ранния бо юности твоея и до старости маститыя неослабно Богу благоугождал еси и волю Его святую присно творил еси, чесо ради кончину праведную яко венец подвигом твоим от Господа получил еси, и благоухание сладостное от мощей твоих абие по кончине твоей истече, всю обитель твою облагоухав. Тем же и мы, таковое преставление твое прославляюще, зовем ти сице:

Радуйся, великий угодниче Божий, от земли прешедый к обителем небесным;

радуйся, блаженный наследниче Царствия Христова, достойное возмездие получивый по делом твоим благим.

Радуйся, воздух облагоухавый восхождением души твоея святыя в селения горняя;

радуйся, обитель твою освятивый
многоцелебными твоими мощами.

Радуйся, яко душа твоя в руке Божией
хранима есть навеки;

радуйся, яко прочее не прикоснется тебе ни
скорбь, ни болезнь.

Радуйся, яко и тело твое на земли
благоуханием дивным прославися от Господа;

радуйся, яко мощи твоя святыя исцеления
благодатныя верным источают.

Радуйся, яко мощей твоих демоны трепещут;
радуйся, яко приял еси от Господа власть на
духи нечистыя.

Радуйся, яко молитвами твоими сокрушаеши
всю их силу, аки паучину;

радуйся, яко предстательством твоим
освобождаети человеки от злаго их насилия.

Радуйся, Димитрие, великий чудотворче.

Кондак 10

Спаса Христа умоляеши за град твой и люди
твоя, преподобне чудотворче Димитрие; сие бо
показал еси яве, во дни обложения ратнаго
Вологды, явлься единой благочестивей инокине с

двема светлыми белоризцы от скудельницы, обходя стены града и утверждая их, да непоколебимы пребудут от нападения враждебныя рати, яже вскоре со студом отступи от града, не возмогши его победити, люди же вологодстии прославляху твое заступление и вопияху Богу: Аллилуия.

Икос 10

Царя Небеснаго, Господа Иисуса, верный раб и угодник был еси, преподобне отче Димитрие, и от Него получив велию благодать, царю земному благоверному великому князю Иоанну, победити царство Казанское помогл еси, явлься среди полков российских и поборая им на агаряны нечестивыя, яко помощию твоею небесною, вскоре взяти им стольный град их Казань. Сие явление твое мы воспоминая, благодарственно зовем ти:

Радуйся, святче Божий, со святыми обитаяй и за грешныя Бога умоляяй;

радуйся, угодниче Христов, от горних высот к земнородным милостивно приникаяй.

Радуйся, любовь твою к отечеству земному и по смерти сохранивый;

радуйся, помощь твою святую стране
российстей чудесно проявивый.

Радуйся, яко архистратиг воем российским
на агаряны поборавый;

радуйся, град Казань взяти им дивно
помогавый.

Радуйся, град твой Вологду от нападений
ратных множицею избавивый;

радуйся, икону твою честную чудесы
многими прославивый.

Радуйся, от мощей твоих святых исцеления
благодатныя обильно источивый;

радуйся, единым призыванием имене твоего
недуги тяжкия уврачевавый.

Радуйся, сострадания преисполненный и в
милости богатый;

радуйся, обители твоея святыя страже
неотступный.

Радуйся, Димитрие, великий чудотворче.

Кондак 11

Пение наше молебное милостиво прими,
угодниче Божий, преподобне отче Димитрие, и
щедроты твоя целебныя даруй нам в недужех

наших; тебе бо стяжахом врача изряднаго и немздоприимнаго, присно готоваго помогати нам и исцеляти недуги наша, данною ти от Господа благодатию, юже прославляя, от благодарныя души вопием тобою благодеевшему нам Богу: Аллилуия.

Икос 11

Светлыми лучами чудес твоих благодатно просвещаеши, святе чудотворче Димитрие, не токмо град твой и обитель твою, но и всю страну российскую, в нейже, яко великий угодник Божий, усердно прославляешия от верных, ближним и дальним щедроты твоя целебныя милостиво даруяй, да вси радостно взывают ти сице:

Радуйся, великоименитый всероссийский наш заступниче; радуйся, ангелонравный человекче.

Радуйся, звезда утренняя, мрак нечестия прогоняющая;

радуйся, забрало неборимое от враг видимых и невидимых.

Радуйся, молитвами твоими святыми град твой ограждай;

радуйся, предстательством твоим небесным
обитель твою от всякаго зла соблюдаяй.

Радуйся, приходящим на поклонение мощем
твоим святым дары целебныя щедро подаваяй;

радуйся, верно молящимся тебе на помощь
ускоряяй.

Радуйся, в сонних и видениих благочестивыя
посещаяй;

радуйся, огненное запаление призыванием
твоего имени угашаяй.

Радуйся, беспомощных скорый помощниче;
радуйся, благодати Божией многоцелебный
источниче.

Радуйся, Димитрие, великий чудотворче.

Кондак 12

Благодати причастное изображение лица
твоего даровал еси нам в благословение и
утешение, преподобне отче Димитрие, и от него
чудеса многая совершил еси яко чудотворец
преславный. Темже с верою и любовию
поклоняемся чудотворней иконе твоей, святой
наш предстателю, и, величая возвеличившаго тя
Христа Господа, хвалебно зовем Ему: Аллилуия.

Икос 12

Поюще многая твоя чудеса и велие сострадание твое к людем ти сродним, Димитрие богоблаженне, благоумиленно просим тя, небеснаго заступника нашего; принеси за ны усердныя молитвы твоя ко Господу и испроси нам кончину живота благую и непостыдную; да помощию твоею святою спасение вечное унаследуем и вкупе с тобою водворимся тамо, идеже присещает свет лица Божия и веселит вся от века праведники. О сем тя молим и зовем:

Радуйся, благоволением Пресвятыя Троицы осененный;

радуйся, лицезрения Пресвятыя Богородицы удостоенный.

Радуйся, ангельских ликов собеседниче;

радуйся, всех святых присный друже.

Радуйся, Агнцу Божию последовавый на земли;

радуйся, с девственными лики предстояй Ему на небеси.

Радуйся, со избранники Божиими покланяйся Творцу;

радуйся, дерзновение молитвенное стяжавый
к небесному Отцу.

Радуйся, о Нем же радуются и Бога славят
человецы;

радуйся, Его же трепещут и боятся души
ТЪМЫ.

Радуйся, душ и телес наших благодатное
врачевание;

радуйся, по Бозе и Пресвятей Богородице
крепкое наше упование.

Радуйся, Димитрие, великий чудотворче.

Кондак 13

О великий чудотворче и скорый в бедах
помощниче, преподобне отче наш Димитрие!
Тебе молимся и тебе просим с верою и любовью;
приими милостивно сие малое хвалебное пение,
от усердия нашего тебе приносимое, и умоли
Господа Бога, в день страшный Суда Его,
помиловати нас и избавити осуждения вечнаго,
но да сподобимся блаженныя части одесную Его
стоящих, и радостно Ему воспоем: Аллилуия.

*Этот кондак читается трижды, затем икос
1-й и кондак 1-й.*

Молитва

О священная главо, предивный чудотворче, преподобне и богоносне отче наш Димитрие! Усердно припадающе к тебе, молимся; яви нам, смиренным и грешным многомощное твое заступление. Се бо грех ради наших не имамы дерзновения ко Господу просити Его даров, нам благопотребных, но тебе, молитвенника к нему благоприятнаго, предлагаем и просим; испроси нам у благости Его вся, яже на пользу душам и телесем нашим; веру праву, надежду несомненну, любовь нелицемерну, во искушениях мужество, в злостраданиих терпение, в молитвах постоянство, в благочестии преуспеяние, вожделенное здравие, земли плодоносие, воздуха благорастворение, дожди благовременны, житейских потреб довольство, мир во днех наших и благословение свыше на вся благая дела и начинания наша, и да не во зло обратим дары Его, но в славу имени Его святаго и в прославление твоего о нас ходатайства. Испроси, угодниче Христов, у Царя царствующих и Господа господствующих богохранимей стране нашей Российстей тишину и благостроение, на враги же победу и одоление. Не забуди, чудотворче святой, милостивно

присещати град твой и обитель твою, и вся грады и веси страны нашея православныя, сохраняя и соблюдая их молитвами твоими от всякаго зла. Помяни всех, веру и любовь к тебе имущих, имя твое молитвенно призывающих, и на поклонение мощам твоим святым приходящих, и вся во благих прошения их милостиво исполни, осеняя их свыше святоотеческим твоим благословением. Ей, святче Божий! Не лиши и нас грешных твоего многомощнаго заступления, но сподоби нас кончину жития благую улучшить и Царствие небесное унаследити; да воспоем и прославим дивнаго во святых Своих Бога нашего, Отца, и Сына, и Святаго Духа, во веки веков. Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
НЕБО**